

張釋之執法

zhong` shid` zii` zhib fab

作者：司馬遷

年代：西漢

散文

釋之為廷尉，上行，出中渭橋，

有一人從橋下走出，乘輿馬驚。

於是使騎捕，屬之廷尉。

釋之治問。曰：「縣人來，

聞蹕，匿橋下。久之，以為行

已過，即出，見乘輿車騎即走

耳。」廷尉奏當，一人犯蹕，

當罰金。

文帝怒曰：「此人親驚吾馬，

吾馬賴柔和，令他馬，固不敗

傷我乎？而廷尉乃當之罰金！」

釋之曰：「法者，天子所與

天下公共也。今法如此而更重

之，是法不信於民也。且方其

時，上使立誅之則已。今既下

廷尉，廷尉，天下之平也，一

傾而天下用法皆為輕重，民安

所錯其手足？唯陛下察之。」

良久，上曰：「廷尉當是也。」